

摘藻堂四庫全書薈要

史部

欽定四庫全書薈要卷七千六百七十九

吏部

春明夢餘錄卷二十八 吏部侍郎孫承澤撰

中書科

中書科直房在午門外之西初中書省設置省舍人後革省為科定中書舍人二十人無正貳印屬資深者掌書誥勅冊符鐵券凡草請翰林院寶請諸內府左券寶籍歸諸古今通集庫凡誥勅勘合籍以急就章為號凡誥勅之號四曰仁曰十二支曰文行忠信曰千字文以

千號為滿滿則續

所典司天子詞命親王郡王竝妃初膺封號合受  
金銀冊則書之自郡王以下至奉國中尉自王夫  
人以下至鄉君合給誥命則書之凡公侯伯初受  
封爵合給鐵券凡勲戚内外文武官應給勅命誥  
命則書之其職掌至重也每大朝會則擬四員與  
翰林史官上殿東西班對立凡東宮節令朝賀定  
擬二員文華殿導駕侍班凡會試一員入場收掌

試卷日給大官酒饌與翰林宮坊尚寶司六科同  
為侍從之臣諸司無相並者其地勢至清也其選  
用自進士外舉人與纂脩書成被恩典者乃得之  
監生生儒惟有勲勞大臣暨宮僚講官有子孫宜  
承廕叙奉特旨者乃得之至文華殿門東房別設  
中書舍人分直職專奉旨書寫書籍等項武英殿  
門西房別設中書舍人分直職專奉旨寫篆冊寶  
圖書等項內閣誥勅制勅二房中書不屬中書科

中書所書告身皆佐史體無佳筆隆慶中司馬王  
崇古以泥金書軸請寶為言者所糾然唐制皆名  
手書如顏魯公自書告身朱巨川一人而顏魯公  
徐季海俱為之書巨川賴此以傳至宋即當制者  
書字兼真行幸得歐蘓便奉為瓌寶

張文忠璫言成化以前誥勅之體猶為近古其於  
本身不過百餘字祖父母父母竝妻不過六十字  
言之者無費詞受之者無愧色近來藻情飾偽張

百成千以萬乘之尊下譽匹夫匹婦之賤殊非政  
體宜加釐正詔自今誥勅務從簡實不許競飾浮  
詞致褻體制夫立詞失體固當申飭而書法板俗  
迄無言者

邱濬曰唐武德二年改內史舍人為中書舍人臣  
案此中書舍人設官之始然是官也故隸於中書  
省故以中書舍人為名我朝罷中書省尚仍其舊  
名名雖同而實則異也蓋前代之中書與翰林學

士分掌內外制誥以為兩制蓋屬文之官也我朝之中書舍人則專以書寫為職耳書者六藝之一漢人謂之小學以試學童為吏者也夫人能之無容設官設之始自今日蓋以王言所係之重前代乃屬筆於吏胥殊無慎重之意祖宗以此設官蓋有深意必得夫素通儒術深明六書之義心正筆端如柳公權所云者居之庶不汙王言耳苟粗識偏旁而學術無素者尚不足以當此况又粗率側

媚而流品非清者哉

誥勅

唐最重誥命開元二十三年加皇子榮王以下官  
詔張九齡蕭嵩等十三人就集賢院人書一通以  
進三相各賜絹三百疋餘官二百疋其愛重如此  
唐制拜官之日即給告身其人先輸朱膠綾紬價錢  
方准書給即今之誥勅也宋之制亦然每至宣麻誕  
告鎖院演綸詞頭已下外人未知其密且重如此

明初拜官之初亦給誥勅其後除授陞遷止奉成命吏部備書旨意移以咨劄以為憑據至考滿覃恩方給誥勅以獎其成

宋元封贈大父母降父母一等封贈父母降本身一等蓋推恩近重而遠輕也然子孫之心終有不忍明制封贈三代一如見爵教孝之典可謂大備封典有再醮不得受封之說典制為妻不為母引楊文貞事辨之然正不必然也按會典曰洪武二

十六年定凡曾祖父母祖父母父母曾犯姦盜除  
名等罪及例所封妻不是以禮娶到正室或係再  
醮娼優婢妾竝不許申請其昭然如是乃有以母  
再醮不請封者殊失考

各中書考

石民外集曰中書舍人以進士起家為此者有官  
而無署且俗謂中書科者乃因與六科聯署而借  
言之實文移奏疏不入此字也其職業惟用寶之

時同符卿供事蓋尚是政府之遺體其他引班等職則以補科臣不足亦以聯署而及之耳絕無繕寫之職其以選入制勅房者舊時進士亦為之今止以待舉人之高選其職為草武臣誥命贈卹誥勅諭祭文此外制也亦不與繕寫其餘兩房史館文華殿則以繕寫為職而武英殿辦事及舊有仁智殿辦事則且及於畫即古之書畫學又不特繕寫也至於貲入兩殿者則借以帶銜實無職掌他

銜皆可辦事蓋在辦事不在中書也以中書多譌而為兩殿中書耳而兩殿資深者亦有校理書籍之名書不在殿何以得校此欲文其名而失其實也

詔勅房中書永樂初選翰林文學之臣六七人直文淵閣叅典機務詔冊制詔皆屬之而膳副繕正則中書分直更入事竣輒出宣德間三楊始置厨饌於閣之東偏而選能書者處以閣之西小房謂

之西制勅房諸學士則居閣之東五楹專管勅誥具稿定正於閣臣乃付中書繕進謂之東誥勅房而帶知制誥銜則惟閣臣與諸學士而已中書等官不敢僭也時諸學士每早與閣臣會食乃退正統九年陳循入閣後學士惟劉鉉一人過自遜避朝退止於東閣不復會食視誥勅以後學士皆因之至後誥勅悉委於中書而中書稱為內閣書辦萬歷元年定兩殿中書九年考滿官階陞至正五

品止如再有年勞止得加陞服俸

識餘錄云中書周令溫州人嘗言成化年間授職  
彼時中書與閣下如同僚然投刺俱平交蓋宣德  
以前本一堂相處今之西房即文淵閣也閣臣居  
中中書居東西兩房各辦其事已撤內庫十間以  
西五間居閣下謂之文淵閣以東五間藏書籍而  
東房中書亦遷居之故今以閣下稱中堂而東西  
非房矣猶稱兩房者沿舊名也凡閣下到任尚之

兩房答揖若六部之於各司無是體矣

附記

崇禎元年上諭近來誥勅文字繁稱過情殊為非體以後撰擬不由詞臣繕寫不由中書者俱與著實查駁

春明夢餘錄卷二十八

欽定四庫全書薈要卷七千六百八十

史部

春明夢餘錄卷二十九 吏部侍郎孫承澤撰

宗人府

宗人府在皇城之東吏部衙門之上坐東向西洪武三年置大宗正院正一品二十三年改為宗人府設宗人令左右宗正掌皇族之屬籍以時脩其玉牒書宗室子女嫡庶名封生卒婚嫁謚塋之事初以秦王為宗人令晉王燕王左右宗正周王楚王左右宗人及建都北京

永春侯王寧洪熙宣德武定侯郭鉉署事正統三年始  
建府西寧侯宋瑛嘉靖中京山侯崔元署事寧瑛元皆  
駙馬都尉鉉仁宗貴妃弟崇禎五年壬申推掌印以近  
代多用都尉諸戚畹太康伯張國紀輩起而爭之然竟  
用都尉至己卯再推復力爭仍用都尉萬煒

周禮少宗伯掌三族之別以辨其親疎此宗人立  
官之始後世因之置宗正然列於九寺之中至明  
特立宗人府於六部之上玉牒始於宋大中祥符

其制考定世次枝分派別而歸於本統者為僊源  
積慶圖推其所自出至於子孫而列其名位者為  
宗藩慶系錄具其官爵功罪生死及若男若女者  
為類譜記同姓之親而序其五服之戚疎者為屬籍  
編年以紀帝系而載其歷數及朝廷政令之因革  
者為玉牒

明之玉牒至嘉靖重脩其總圖倣古史世表之法  
以橫格分代數列書其名氏而各派所出之子孫

則遞書於各派之下仍餘下方以俟續書其圖以  
帝系為統有雖係長出而在藩封及國初加封為  
王者俱不以加書於帝系之前有長出而殤追授  
封號者惟冊內載之不以列於圖蓋從禮部之議  
也禮部疏云嘉靖二十四年九月初一日內閣題  
玉牒事宜臣等為照玉牒紀載宗支以垂萬世係  
朝廷重事其制不敢不倍加詳慎其舊牒內有事  
當釐改者理合開具上請臣等看得第一冊內例

有總圖備載天潢世系於首所以表帝王之統合  
同氣之親也切因世代未遠人數未多有紙一面  
列書代氏而以硃線各系所出之子孫於下但近  
年以來宗派蕃衍已倍於前其數不下累萬茲仍  
用前制不惟紙狹不足備載而字跡微眇硃線紛  
亂難以尋檢不無遺漏混淆之弊況將來天支萬  
代愈難增續臣等竊意畧倣古史世表之法以橫  
格分代數而列書其名氏於上其各派所出子孫

則從而遞書於各派之下庶世次不紊一覽可見  
仍餘下方以俟後來增入臣等又思得玉牒之脩  
當以帝系為宗統其中有雖係長出但不有天命  
位在藩封如懿文太子秦晉二王不敢以加於成  
祖之前又有雖係長出但既殤而追受封號如悼  
恭太子岳懷王哀冲太子惟當以冊內載之不敢  
列於圖之前俱所以尊帝統也其無可仿如潁陽  
等王則仍書之又壽春王熙祖之長子仁祖之兄

也南昌諸王仁祖之長子太祖之兄也俱在太祖  
有天下之後追封為王今靖江王則南昌王之後  
以太祖之聖子神孫視之則有堂從之分舊圖  
以列於帝系之前今移置本支之後亦所以尊帝  
統也

明太祖自叙世德碑本宗朱氏出自金陵之句容  
地名朱巷在通德鄉上世以來勤農桑五世祖仲  
八公娶陳氏生男三人長六二公次十二公其季

伯六公是為高祖考娶胡氏生二子長四五公次

即曾祖考四九公娶侯氏生子四初一公初二公

初三公初四公初一公凡四子初一公配王氏為

祖考妣有子二人長五一公次即先考諱世珍元

初籍淘金戶金非土產市於他方以先祖初一公

困於役遂棄田廬攜二子遷泗州盱眙縣先伯考

五一公十有二歲先考纔八歲先祖營家泗上置

田治產及卒家日消由是五一公遷濠州鍾離縣

其後因至鍾離居先伯考性淳良務本積德與人

無疾言忤意鄉里稱善人先伯娶劉氏生子四人重

一公重二公重三公生盱眙重五公生鍾離先考

君娶陳氏泗州人長重四公生盱眙次重六公重

七公生五河某其季也先遷鍾離後戊辰年先伯

公有孫六人兵興以來相繼寢沒先兄重四公有

子曰文正今為大都督重六重七俱絕嗣曩者父

兄因某自幼疾捨入皇覺寺中甲申父母長兄俱

喪次兄守業又次兄出贅劉氏某托跡縑流至正二十四年天下大亂諸兄皆亡淮兵大起掠入行伍乃招集義旅兵力漸衆因取滁和龍鳳三年帥師渡江駐兵太平為念先考君常言世為朱巷人宗族俱存平日每有鄉土之念即訪求故鄉宗族之所遂調兵取句容明年克金陵而朱巷距城四十里族父兄昆弟四十餘人至始得與之叙長幼之禮行親睦之道但朱氏世次自仲八公之上不

可復考今自仲八公高曾而下皆起家江左歷世墓在朱巷惟先祖塋泗州先考塋鍾離此我朱氏之源流也爰自金陵太平駐師開府為基本之地實鄉郡焉屢歲征伐拓境吳楚甌越方數千里由是累有顯爵乃龍鳳九年三月十四日內降制書曾祖考為資德大夫江南等處行中書省右丞相上護軍司空吳國公曾祖妣侯氏吳國夫人先祖考稱大夫江南行中書省平章政事上柱國司

徒吳國公祖妣王氏吳國夫人先府君開府儀同  
三司錄軍國事平西右丞相吳國公先妣陳氏吳  
國夫人以閏月十三日祇謁隴上焚香告祭遵舊  
典也重念報本禮行宜厚今勉建事功匪由己能  
實荷先世靈長之澤垂衍後昆報恩三代并為公  
以遂子孫者之至願書曰作善降之百祥易曰積  
善之家必有余慶先祖父積功累善天之報茂於  
厥後凡我子孫皆當體祖宗之心蹈德存仁以永

其緒於無窮是吾之所望也於是備書於後以傳  
信將來有所考焉

按明緒本顓頊周諸侯國於邾漢司空朱浮裔太  
祖不肯冒附名族惟以所知德祖為始祖其見過  
於漢唐遠矣

帝系

明高皇二十六子懿文太子秦愍王晉恭王成祖  
文皇帝周定王楚昭王齊庶人潭王梓趙王杞魯

荒王蜀獻王湘獻王代簡王肅莊王遼簡王慶靖  
王寧獻王岷莊王谷庶人韓獻王濬簡王安惠王  
唐定王郢靖王伊厲王皇子楠

太宗四子仁宗漢庶人趙簡王四皇子

仁宗十子宣宗鄭靖王蘄獻王越靖王襄憲王荆  
憲王淮靖王滕懷王梁莊王衛恭王

宣宗二子英宗景皇

英宗十子憲宗榮王三皇子許悼王德莊王秀懷

王崇簡王忻穆王吉簡王徽莊王

景皇一子懷獻太子

憲宗十三子悼恭太子孝宗睿宗岐惠王益端王衡恭王  
雍靖王壽定王八皇子汝陽王涇簡王榮莊王申懿王

孝宗二子武宗蔚悼王

睿宗二子岳懷王世宗

世宗八子哀冲太子莊敬太子穆宗景王頽殤王  
薊哀王戚懷王均思王

穆宗二子神宗潞王

神宗五子光宗福王惠王桂王瑞王

光宗二子熹宗崇禎帝

崇禎帝三子皇太子永王定王

二祖公主

明太祖十六女長女臨安公主駙馬都尉李祺寧  
國大長公主梅殷安慶公主歐陽倫汝寧公主陸  
賢懷慶大長公主永春侯王寧大名大長公主李

堅福清公主張麟壽春公主傅忠南康大長公主  
胡觀永嘉大長公主郭鎮汝陽大長公主謝達寶  
慶大長公主趙煇餘未詳

成祖五女永安公主廣平侯袁容永平公主富陽  
侯李讓安成公主西寧侯宋琥咸寧公主西平侯  
宋瑛常寧公主沐昕又按懿文江都公主耿璿  
御定名次

懿文太子位下允文遵祖訓欽武大君勝順道宜

逢吉師良善用晟

秦王位下尚志公誠秉惟懷敬誼存輔嗣資廉直  
匡時永信惇

晉王位下濟美鍾奇表知新慎敏求審心咸景慕  
述學繼前脩

燕王位下係帝系高瞻祈見祐厚載翊常由慈和  
怡伯仲簡靖廸先猷

周王位下有子同安睦勤朝在肅恭紹倫敦惠潤

昭恪廣登庸

楚王位下孟季均榮顯英華蘊盛容宏才升博衍  
茂士立全功

齊王位下賢能長可慶睿智實堪宗養性期淵雅  
寅思復會同

魯王位下肇泰陽當健觀頤壽以弘振舉希廉達  
康莊遇本寧

蜀王位下悅友申賓讓承宣奉至平懋進深滋益

端居務穆清

湘王位下久鎮開方岳揚威謹禮儀剛毅循超卓  
權衡素自持

代王位下遜仕成聰俊充廷尉鼎彝傳貽連秀郁  
炳耀壯洪基

肅王位下瞻祿貢真弼縉紳識烈忠曦暉躋富運  
凱諫處恒隆

遼王位下貴豪恩寵致憲術儼尊儒雲初祺保合

操翰麗龍輿

慶王位下秩邃寔台萬倪伸帥倬竒适完因巨衍  
隲眷發需毘

寧王位下磐奠覲宸拱多謀統議中總添支庶濶  
作哲向親衷

岷王位下徽音膺彥譽定幹企禋雍崇理原諮訪  
寬鎔喜賁從

谷王位下賦質僖雄敞叢興闡福昌篤諧恂懌豫

擴霽昱禎祥

韓王位下冲範徵偕旭融謨朗璟達亶韶愉顥慥  
合緒价藩維

藩王位下佶幼詮勛肩恬程效廻璁湜源諲哲暉  
圭璧澈澄昂

安王位下斐序斌延賞凝覃濬祉襄恢嚴顥輯矩  
鎮密廓程綱

唐王位下瓊芝彌宇宙碩器聿琳琚啟齡蒙頌體

嘉歷協銘圖

郢王位下偉聞叅望爽箴誨洎臯夔麒麟餘積兆  
奎穎煜璿璣

伊王位下顓勉謏訐典褒珂采鳳琛應疇頒胄選  
昆玉冠泉金

靖江王位下贊佐相規約經邦任履亨若依純一  
行遠得襲芳名

舊有潭王位下福昌忻保定嘉應必興隆啟處詢

從式尊聞汝貴中以國除祖訓不載靖江王府不以五行為拘

封建

洪武元年既立長子標為皇太子三年四月詔封諸子為王分鎮各省第二子棧秦王國西安第三子櫜晉王國太原第四子即成祖燕王國北平第五子楠周王國汴梁第六子楨楚王國武昌第七子搏齊王國青州第八子梓潭王國長沙第九子

杞魯王國兗州第十子檀蜀王國成都第十一子

湘王國荊州絕後又封子代王大同肅王甘肅後

移蘭州遼王廣寧後移荊州慶王寧夏寧王大寧

後移南昌國除岷王雲南後移武岡谷王宣府絕

韓王平涼藩王潞安安王某處絕唐王南陽郢王

安陸絕伊王洛陽又封兄子為靖江王國廣西上

親製祖訓頒賜太子諸王親王歲祿五萬石後定

為萬石慶肅諸王亦有二千石者親王嫡長子襲

封餘封郡王郡王嫡長子襲封鎮國將軍鎮國子  
俱輔國將軍輔國子俱奉國將軍奉國子俱鎮國  
中尉鎮國子俱輔國中尉輔國子俱奉國中尉郡  
王初封祿二千石嗣封一千石其將軍中尉以次  
遞減至二百石皇女為公主祿二千石親王女為  
郡主郡王女為縣主郡王孫女為郡君曾孫女為  
縣君元孫女為鄉君祿亦遞減至二百石其配駙  
馬儀賓宮室服色儀仗各有差具載會典玉牒

# 削除

齊王榑永樂四年并世子諸王俱削爵錮南京西  
內宣德三年以嫌賜裁少子賢懋存谷王榑永樂  
十五年并世子諸王俱削爵錮西內宣德三年以  
嫌俱賜裁漢王高煦宣德九年并世子諸王俱削爵  
錮西內後俱賜裁又齊谷以反構漢以反皆誅其  
子故國盡除荆王見瀟弘治中削爵錮西內尋賜  
裁以弟之子和王嗣國不除楚世子英耀嘉靖二

十四年誅庶弟恭王嗣國不除晉王濟熈永樂十  
二年削爵守恭園弟濟熿立宣德三年濟熿削爵  
錮鳳陽高牆濟熈子憲王嗣國不除遼王貴烺正  
統中削爵守簡園弟肅王嗣國不除寧王宸濠正  
德十五年反誅國除諸弟兄爵如故徽王載堉嘉  
靖中削爵錮鳳陽高牆國除伊王典璘隆慶中削  
爵錮鳳陽高牆國除遼王憲爝隆慶中削爵錮鳳  
陽高牆國除唐王宗禎九年削爵錮鳳陽高牆國

不除

宗籍

玉牒所載親王二十四郡王二百五十一鎮輔奉  
國將軍七千一百鎮輔奉國中尉八千九百五十  
一郡主縣主郡君縣君七千七十三庶人六百二  
十而未封未名者與夫齊府之餘高墻之庶皆不  
與焉

宗例

慶成王晉恭王之曾孫也弘治五年八月山西巡撫楊澄等奏王子女至九十四人恐其中有收養異姓之弊且為子鎮國將軍奇澂等增年冒支祿米乞下禮部議處并乞下各郡王以下定妾媵之數禮部查勘覆奏謂王子女俱王妃夫人并宮人室女所生別無違碍其冒支祿米法宜追徵還官得旨王子女既無違礙其冒支祿米不必追徵准作以後年分該支之數法司原奏有不許濫收子

女事例仍行各王府知會自郡王以下妾媵多少之數再會官定議以聞禮部復會議覆奏謂郡王自正妃外妾媵不得過四人各將軍不得過三人中尉不得過二人從之著為令

成化中追降韓府漢陰王徵鍵為庶人王母平氏妃周氏及冒封郡王縣主者皆賜死妃父周恂凌遲處死妻妾子皆梟首籍其家仍貽書天下諸王以王無子將死令宮人若有娠者以托韓王及諸

王既薨妃父恂與王母及妃謀取其妾之女與他人男前後令妾與子抱納宮中既長請於朝俱受封上惡其冒亂宗支故特以異法處之

天順中命諸宗室凡無子者方許請繼室生子至八歲者方許請名女至十五歲者方許請封

景泰時岷王徽燦奏蒙封臣子音埒為長子臣弟徽媚為江川王凡遇節令及家庭行禮班次不定命禮部議以宗子法言之則以嫡長為重以家人

禮言之則以尊卑為先凡遇公禮則當依宗子法  
重在世子家庭私禮則當依家人禮尊歸叔伯

天順末年楚府岳陽恭僖王薨無嗣其弟鎮國將  
軍墀嫡長子輔國將軍均鎰請嗣封以奉恭僖之  
祀禮部言稽考近制惟親王無嗣有以郡王進封  
者郡王無嗣有以鎮國將軍進封者無輔國將軍  
封郡王例事遂止

崇禎帝系

諭德許士柔帝系不可畧疏臣備員史局執事神廟熹廟兩朝纂脩之役得於皇考實錄大端目涉手鈔反覆參定尤加詳覈竊以為本朝實錄一書即古帝王本紀史家編年遺意也其間提綱振目最重且大莫若聖作明述世系相傳之際故總記之則父子母后之倫書之必其備分紀之則兄弟同宮異寢之序書之又必其明惟明且備乃為實錄此定體也以臣觀於皇考改錄世系獨畧萬不

可解此不可以當代闕文傳疑後世積慮於中欲  
陳已久今請為皇上備陳之而加裁察焉臣謹按  
原錄萬歷三十三年乙巳十一月十四日皇考第  
一子生命廟諱孝和皇后出此熹廟篤生之自所  
當書也後三十四年丙午十二月二十八日皇考  
第二子生命某名孝和皇后出追封簡懷王後三  
十七年己酉七月十五日皇考第三子生命某名  
母選侍王氏出後三十八年庚戌十一月十六日

皇考第四子生命某名母選侍李氏出此諸皇子  
遞生之自所當書也迨至我皇上鳳乳龍興之瑞  
孝純皇后捫天懷日之祥亦實在萬歷庚戌間則  
聖母氏族所自出封號所自隆錄中固自當具載  
皇上娠教之年聖誕之日命名之典潛邸之號錄  
中尤自當表明蓋必如是而後倫備而序明可以  
見皇考當時前有為之作後有為之述後宮多覩  
天之媛五葉肇承乾之胤暨乎聖母麟趾之並庥

王母葛藟之綏福昭代盛烈誠可以光示於天下  
萬世無窮也亦必如是始見我皇上帝立之最奇  
天命之攸歸三代以來所未有而昭代二百餘年  
所僅見也乃臣所閱改錄則考以皇上娠教之年  
聖誕之日不書也命名之典潛邸之號不書也臣  
不能解也更考以聖母出何氏族受何封號不書  
也臣不能解也而且徧及諸王之生與所生之自  
花萼相輝之美鵲鳩並飼之仁不書也臣不能解

也所書者止三十三年乙巳皇考第一子而已夫  
皇考實生五子而何以獨紀其一皇上實有四兄  
而何以竟遺其三臣不能解也且臣同官文震孟  
所言此改錄所筆焉者也筆焉而不信天下萬世  
猶得按其筆而正之若今臣所言此改錄所削焉  
者也削焉而不著則將使天下萬世讀皇考實錄  
者謂聖躬之誕降果何辰謂聖母之發祥果何姓  
謂其間花萼輝映者又果幾何人是使聖朝父子

母后兄弟之大倫皆缺而不具晦而不辨也臣所謂不可解者此也或者為之解曰皇上之誕降聖母之發祥在皇考之錄雖不書而萬歷三十八年皇第五孫之生當必書之也臣則曰自仁率親上而至於祖自義率祖下而至於禰祖廟尊而遠何若禰廟親而近以明明天子不大書於禰廟皇子之列而附書於祖廟皇孫之列此何可為訓也又或為之解曰皇上之誕降聖母之發祥在皇考之

錄即不書而天啓初年皇五弟之冠婚冊號當必書之也臣則曰父子相傳之謂世兄弟相傳之謂及總繇一本之繼體須辨兩宮之各乳况冠婚冊號乃成立以後之典禮誕降發祥乃哲命初生之本原本原蚤已不著典禮何自而加以明明天子不蚤揭其天錫岐嶷之始而雜見於藩邸婚封之列又何可為訓也若此者其在當日筆則筆削則削果無心耶抑有心耶其無心也是玩帝系而輕

削之不可訓也其有心也是紊帝系而故削之是可忍也孰不可忍也今原錄雖不藏史宓然聞當日之史臣嘗挈而藏之閣中矣皇上試命典籍搜取詳加睿覽此段紀載原錄有是乎無是乎原錄而有之則原錄宜復也原錄而無之則改錄何以不補也况原錄之成在皇上潛邸之日而統系之詳慎如此及改錄之成在皇上御極之初而統系之慢忽如彼將何以傳信天下萬世也而宮闈更

有大典今日不容不著明者孝元貞皇后皇考之  
元配也遡青宮承飾之春則當以萬歷三十年二  
月書大婚以正其始迨副禕掩綵之冬則當以萬  
歷四十一年十二月書辭御以正其終而今錄勿  
書也天下後世考皇考元配之始末者將何徵也  
孝和皇后熹廟之所鍾慶也在承華懸矢之辰業  
已於萬歷三十四年三月書封號以著有初至景  
殿驚葭之夕亦當以萬歷四十七年三月書辭御

以著有卒而今錄又勿全書也天下後世考熹廟  
鍾慶之始末者又將何徵也至孝純皇后之辭御  
日月已載著祀典而其年亦不著於錄中此又所  
當詳載者也臣所謂總紀之欲其備分紀之欲其  
明者此也總之今日之錄本紀編年之意微而提  
綱振目之法泯義例不問所重輕筆削不衷所緩  
急而臣於皇考實錄尤獨註詳者則以列聖實錄  
祇取當年之行事分著本年之條目而遂可備一

王之書皇考實錄必以一月之紀載備舉四朝之大綱而後可以成一代之史此臣所以積慮於中欲陳已久不能不為皇上備悉之而仰祈聖裁者也

又詳考補牘以效史職疏臣前有帝皇世系一疏仰祈聖鑒按取原錄詳加叅訂以定信史奉旨實錄體裁自有累朝成例不必復滋煩議臣恭繹明綸敢不敬懼奉持無容再瀆然臣終夜思維平旦

憬然竊有不得已而言者則臣嘗攷之累朝實錄  
矣臣未暇全舉即以我太祖高皇帝二十六子憲  
宗純皇帝十有三子其最盛也而實錄中書誕生  
名書婚書封母后著焉仁宗昭皇帝十子世宗肅  
皇帝八子亦最盛也而實錄中書誕生名書婚書  
封母后著焉次及妃嬪公主以至冠婚典禮莫不  
燦列昭如雲漢是帝皇世系為成例者也但我皇  
考在位止是一月其世系書法既不能如列聖條

析於編年之中自當挈要提綱統列於總紀之首而臣閱改錄掛漏殊甚即我皇上聖母孝純皇后泣未紀載其餘可知且臣溯此錄告成之日在皇上元年二月是皇上登大寶既半年矣我朝列聖一帝止生一帝而我皇考一帝而生二帝則為臣子者以皇考總紀之首篇紀皇上龍興之盛事自是千古無兩之美業而改錄不然反舉原錄而刪削焉則臣前疏所論列者政謂夫改錄與累朝成

例有所不合也。如果合成例，臣又有何言？若原錄總紀，則世系明備，仰祈我皇上試宣取詳覽，其是非得失，必有瞭然者。此臣前疏所謂原錄宜復也。乃臣積慮詳訂前疏，有未敢深言與未及悉言者，以聖明在上，臣安敢復隱而不吐？以朦朧滋戾。其一曰：高皇后之祭典，宜書也。蓋禮莫大於祭，祭莫重於始祖，而國家以八月初十日高皇后忌辰，祭奉先殿，先二日奏祭，此萬世不祧之廟制，累朝實

錄所必書而世宗肅皇帝以是日聖誕議先期受  
賀議同日舉行實錄所載尤詳今皇考元年八月  
初十日奉先殿行禮弗書也若曰不舉而不書則  
以皇考之孝敬必無此失節若曰舉之而不書是  
以臣子之忽玩陷皇考於廢禮也且是月初八日  
孝康皇后之祭則書初二日先師孔子之祭則書  
而何獨漏於高皇后也其一曰孝端顯皇后之為  
嫡母宜書也夫分莫尊於正嫡而恩莫大於保聖

當孝靖皇后封號未加我皇考青宮未定而貴妃  
顯號先隆之日國本幾危於震虢天心幸託諸坤  
寧商山之羽翼曾未能轉日而河洲之苻藻乃可  
以補天在當日調護之苦心真萬古慈聖之極則  
乃至今外廷尚論夾輔之功而中宮不言顧復之  
德即貴妃尚見封后之論而嫡母不著其恩勤之  
勞此真天理所必不可磨而人心所必不容泯者  
也臣所謂未敢深言者此也又其一曰皇考之冠

禮夫冠禮成人之始嘉事之重與婚禮並書累朝可攷也況古者天子之子十五而冠而皇考以二十而冠即以二十而婚視列帝嘉禮後期已甚此其危疑震撼所關特重今何以不書也其一曰皇考之公主夫公主同氣之至親內戚之至貴與子並書亦累朝可攷也蓋古者男女異長以辨內外而皇考本育八女所存三主則寧德遂平樂安其笄字于歸皆骨肉毛裏所係最親今何以不書也

此臣所謂未及悉言者此也凡此皆大經大法典章首務聖明在上臣子所當有言無諱而皇上孝思無窮所當下明詔令史局著之本錄者也至於書法之宜繁宜簡則以列聖在位多歷年所其於編年既詳則於總紀可約而皇考在位止是一月夫既不暇編年自當詳於總紀此史官之事臣業已具揭閣臣無容贅瀆聖聽也臣職在史局叨祿十有餘年外無疆場汗馬之勞內無民社崑城之

績惟是討論故實次第編摩以供史職庶無瘵官  
故敢不辭數瀆仰祈聖聽

萬歷實錄

萬歷三十三年乙巳十一月皇太子第一子生即  
熹宗選侍王氏出神宗以元孫生頒詔天下諭宗  
藩

三十四年十二月二十八日皇太子第二子生與  
元孫同母命名由櫟四歲薨天啓二年追封簡懷

王

三十七年七月皇太子第三子生命名由輯母選侍王氏八歲薨

三十八年十月十六日皇太子第四子生命名由模母選侍李氏五歲薨

十二月二十四日皇太子第五子生命名由檢天啓二年封信王母選侍劉氏追封正靜賢妃

泰昌實錄

初錄

萬歷三十三年乙巳十一月皇太子第一子生即

熹宗選侍王氏出神宗以元孫生頒詔天下諭宗

藩三十四年丙午二月尊上慈聖徽號是月進封

聖母恭妃為皇貴妃先是羣臣屢請進封皆不允

至是以宮闈喜慶大典告成特諭舉行人情歡悅

三月封元孫母王氏為才人時禮部議上封號不

稱神宗意傳諭再議隨出皇明典禮一書內載皇

太子正妻皆封妃次皆稱才人故禮部奉旨定今

封

三十四年十二月二十八日皇太子第二子生與  
元孫同母命名由櫟四歲薨天啓二年追封簡懷  
王

三十七年七月皇太子第三子生命名由楫母選  
侍王氏八歲薨

三十八年十月十六日皇太子第四子生命名由  
模母選侍李氏五歲薨

十二月二十四日皇太子第五子生命名由檢天  
啓二年封信王母選侍劉氏追封貞靜賢妃

按光宗在東宮生育頗多崇禎初追封皇兄齊思  
王等皇姊悼淑公主等至辛巳五月御札皇六弟  
定懿妃生七弟敬妃生十妹慎嬪生皆殤未追封

擬封六弟湘懷王七弟慧昭王十妹悼溫公主七  
月二十日親定皇六弟名由栩七弟名由榑皇十  
妹名徽姪又追賜九妹名徽嫺仍祭告奉先殿

愍帝生母孝純皇太后生於萬歷壬辰而薨於甲寅七月十九日享年僅二十有三時帝甫四齡及登極詔曰朕惟慶源有自禮必隆於所生孝思永言施必由於親始典闕教衆誼切同心爰章具存肇稱宜亟我皇妣貞靜賢妃芬降華宗躬膺令德徽音夙稟於女史婉懿早著於青蒲在昔皇考毓我弟昆葢華萼共輝於連枝而顧復各勤於離裏我皇兄纂承祧之重典既篤於濬源逮眇躬荷世

及之休情亦深於惓慕欲酬罔極宜備追崇正儷  
體之鴻稱舉遷祔之上典庶永無窮之問少申不  
匱之思於是禮部上尊諡孝純淵靜慈肅毗天鍾  
聖皇后遷祔慶陵

崇禎丁卯九月二十七日冊立皇后諭曰朕聞太  
極元撰首闢乾坤天地合德乃生萬物則君之有  
后固儷體於兩儀而弼成於風化者也朕昭受鴻  
圖誕撫函夏思順陰陽剛柔之道茂衍室家君王

之傳嘉內德於安貞稽懿徽於溫惠敬崇壺教宜  
正隆稱元妃周氏揚芬華族毓慶軫元皇兄慎選  
以配朕躬夙夜無逸而闡敬戒已受封章於潛邸  
丕續景命以維新四德咸脩六宮著範可冊立為  
皇后女順蔚承乾之佑坤寧協應地之符特諭於  
是遣禮部尚書來宗道持節英國公張惟賢捧冊  
大學士黃立極捧璽施鳳來行禮

崇禎元年二月初四日皇長子生誥曰朕惟帝王

膺天歷而奉宗祧首重元儲尤隆世嫡朕以眇躬  
嗣位丕基夙夜祇念我皇祖皇考集慶發祥源深  
緒遠佇昌嗣續仰慰貽謀茲荷上帝居歆宗祊垂  
祐以今年二月初四日第一子生係皇后周氏出  
中闈開冢膺之先萬國愜元良之祝肆頒渥澤覃  
被多方

崇禎三年二月初十日冊立東宮詔曰朕惟自古  
帝王嗣大歷服長治久安莫不首重建儲所以定

宗祧隆國本凝天眷而繫人心也我祖宗列聖相  
承德祚綿洽率繇茲道以裕貽謀朕祇紹丕基兢  
懷付託乃荷皇穹眷祐胤嗣蚤開長子慈娘睿託  
坤元祥鍾震一中外起敬承之頌天人表協應之  
符昨日文武臣民疏請再三舉行冊禮而朕以子  
方襁褓謙讓未遑茲屆青陽載仲之辰正值蒼巽  
誕彌之月禮官復申前請衆志誠難固違爰考舊  
章式諏吉日祇告於天地宗廟社稷授冊寶立慈

煊為皇太子以仰繩累葉無疆之緒俯慰兆人胥  
戴之情大典告成環垓同慶

崇禎十四年九月十八日冊封第三子慈烜為定  
王

十五年三月二十一日冊封第四子慈照為永王  
皇女樂安長公主名徽妮

春明夢餘錄卷二十九



總校官庶吉士

臣侍

朝

校對官檢討

臣

王鍾健

謄錄監生

臣

王心仁

欽定四庫全書薈要

史部

春明夢餘錄卷

三十一

詳校官編修臣繆晉



欽定四庫全書薈要卷七千六百八十一

史部

春明夢餘錄卷三十

吏部侍郎孫承澤撰

五軍都督府

五軍都督府在闕之西皆東向初置統軍大元帥府後改樞密院又改為大都督府秩正一品設左右都督都督同知都督僉事等官洪武十三年始分中左右前後五軍都督府各府都督初間以公侯伯為之叅贊軍國大事後率以公侯伯署府事同知僉事則叅贊軍事永

樂元年建行都督府於北京後仍分五府稱行在某都督府十八年定都北京除行在字在應天者稱南京某府洪熙元年復稱行在宣德三年革行都督府正統六年復建五府其職分領都司衛所凡武職襲替及誥勅旗役併鎗手水陸步騎操練俸糧屯種器械舟車賞賜聲息軍情清勾替補邊腹畫圖貼說薪炭荆葦之事分移所司綜理之

大都督府因樞密院而改建之者也樞密院之職

實古太尉大司馬諸將軍而其名則循唐宦官之  
舊五季託肺腑其權寄宰相上宋顥兵政稍與宰  
相次而號兩府然皆縉紳大夫為之至元而用其  
國人與漢人之以武功顯者第徃徃參互一二縉  
紳以贊其謨畫至明興而截然武弁數矣高帝之  
下集慶置中書省即置行樞密院而自領之功臣  
宿將得序遷為同知僉院同僉判官其品秩皆仍  
元舊至四年辛丑之三月始改置大都督府拜皇

姪文正為大都督節制中外諸軍尋增置左右都督同知副使僉事官以中書叅議李善長兼司馬宋思顏為叅軍經歷都事皆極一時之選而同知僉院之在軍行者尚仍其故不改吳元年甲辰正月即王位定大都督從一品左右都督正二品同知從二品副使正三品僉事從三品尋大都督坐罪廢罷不設以左右都督為長官十月進階俱正一品同知從一品副使從二品僉事從三品三年

革副使陞僉事正二品凡天下將士兵馬大數蔭  
授遷除與征討進止機宜皆屬之十三年分大都  
督為五軍都督府見若以為品秩如其故者而兵  
部陰移之其權漸分矣至永樂而盡歸之兵部所  
謂五軍都督者不過守空名與虛數而已其左右  
都督以下至同知皆以加邊將之有功者其僉事  
以待序遷者而掌印僉書之類必以屬公侯伯間  
有屬老將之實為都督者不能什一也

封拜考

封建古制也而莫詳於周周之天子僅稱王而其  
下為公侯伯子男不能子男者為附庸其命則自  
九而至五其別則有同姓有異姓而其封則以功  
德不以親疎秦始皇并天下創尊為皇帝廢封建公  
族無尺寸之土而猶存侯爵為三等以待有功者  
列侯則如武城通武之類倫侯則如建成武信之  
類皆有邑名而不稱國下者則關中侯有封食而

無邑名然皆金印紫綬而列侯倫侯至位丞相上  
丞相之尊重者莫如李斯九卿之見幸有大功者  
莫如蒙恬兄弟而皆不得沾其慎貴可畧推已漢  
高竒達裂天下以王諸子弟及大功臣而其次則  
因秦之舊為徹侯亦有關內侯凡二等第功臣之  
為王雅非其意至白馬之誓而獨侯國存武帝狹  
海宇鞭誅四夷不愛通侯之印以待有功者即功  
雖尠細或見錄天下之壤地不能侯而國用則益

侈於是苛為之禁以伺其過即斟細亦見削而高  
帝身與共創業之臣所餘無幾封拜日下而侯國  
不日益漢地不小損自武帝而後拜封之與削亦  
漸寡而終東西二京其制畧相彷彿中間雖有呂  
氏之擅王與新莽之盜為公未幾輒罷自魏氏之  
末司馬擅制始復為五等曰郡縣公侯伯曰縣子  
曰縣男皆得稱開國金印紫綬而關內侯有不開  
國者顧反居子男下晉氏以至齊梁陳皆因之若

北魏之與北齊皆崇設王爵以待勲舊而其更有  
功者則別封郡公侯或一人而擔三四爵然同姓  
異姓皆不得為國王而郡縣公侯益卑矣後周宇文  
泰辭安定王遂以安定公終其身而其子篡魏  
進封功臣晉趙等大國然皆稱公而不王隋氏因  
之至唐而始定以子弟為親王正一品其稍疎而  
有功者為郡王功臣之有功者為國公皆從一品  
郡公以至侯伯子男則遞降焉如趙無忌梁元齡

之類皆得世襲而他以恩賜者或世與否自安祿山之為東平王遂毀周例而踰之然中興以後王公之格益輕至有佩橐鞬捧酒炙而趨走於節度之庭者而封亦不復世矣宋興復唐初之制以宗室之懿叙封王爵而其疎者與文武大臣自國公而下至子男徃徃以郊恩遞進徒以媾其名而已戶不得言祿爵不得言世然猶斤斤守其靳焉自蔡京之公兩國而公制紊矣童貫之為王而王制

踰矣南渡以後所謂王者遂冒於宰執如檜如侂  
冑如彌遠矣元承遼金之後王爵尤易即將相非  
勲德可以一嘖笑而得之獨漢人至國公而止明  
高帝下建業草創未遑吳元年始拜功臣李善長  
徐達常遇春為國公而其他功臣之死勤事封疆  
者有國郡公侯伯子男之贈然徃徃一循元舊洪  
武三年始大啟封建皇帝之子為親王親王之從  
庶子為郡王而功臣則公侯伯三等有世襲有流

爵罷子男不置公侯位正一品上伯位正二品上  
朝服進賢冠加籠巾貂蟬世襲者領鐵券流爵則  
否當是時封伯者僅二人忠勤之祿僅當侯三之  
一誠意至不能當六之一而其輕可知矣十年以  
後封東莞微先祿遂與侯等至永樂初而始定居  
侯之下正一品之上其階勲皆與侯等而伯亦重  
矣凡公侯伯之任入則掌叅五府總六軍出則領  
將軍印為大帥督留都莞鑰轄治漕綱獨不得預

## 九卿事

宋制軍旅屬於樞密院與中書省並謂之兩府明以兵部掌兵政而統軍旅專征伐則歸之五軍都督府兵部有出兵之令而無統兵之權五軍有統兵之權而無出兵之令至將屬於五府而兵又總於京營合之則呼吸相通分之則犬牙相制

五軍都督府總天下之戎政國體具存其所闕者甚大明初勲臣俱充叅遊後止充兩廣湖廣漕運

三總兵又次第革而惟戎政五府屬焉五府僉書猶有以都督充者至掌印則必勲臣嘉靖八年令五府掌印官都督有才望者一體推用終不能行都督有三等曰左右都督曰都督同知曰都督僉書是為世官副都督則流官也

都督都指揮等官雖定於洪武初然其稱謂與後亦有不同如稱都督府僉書曰某府僉都督都指揮使司僉書曰某都指揮司左封印右封印皆見

於張統雲南機務抄黃嘉靖間會議疏列五府銜  
僉書與帶俸者槩稱管府事即錦衣衛堂上皆稱  
管衛事亦此例也

初制總兵無專官有事命將事已即歸後因邊境  
多事遂留鎮守然或地方小警調兵勦殺非奉上  
命者即有功亦不稱捷具疏聞而已

明初在外兵馬盡是屯軍指揮千百戶管領而盡  
屬都司提調其制各都司掌印僉書等官缺本處

有相應官聽各鎮巡官保舉兵部擬議具奏本處無官兵部查訪中外相應官員兼用極重其選

衛所之制洪武中設錦衣等上十二衛以衛宮禁留守等四十八衛以衛京城上十二衛為親軍指揮使司番直宿衛不隸於都督府永樂中設五府各衛於北京改前北平三衛為金吾左右衛為羽林前衛改北平都司為燕山左右衛為大興左衛為濟陽通州衛是為上十衛與騰驤左右衛武驤

左右衛四衛亦得名親軍其武功中左右衛以匠役隸工部其諸陵設衛不隸督府亦不稱親軍凡親軍衛得直達兵部其餘衛分流官世官土官襲替優給優養所衛都司上之府引奏送兵部五府以中左右前後為序南以總兵坐中府北以總兵坐後府凡舍人承襲皆以五府試驗必年至二十以上方許比試初試不中者食半俸再試不中者降充軍蓋國初將材皆儲於此故其嚴如此每衛

設指揮使一人指揮同知二人指揮僉事二人又設中前後左右千戶所分領軍士其所領軍士逃亡者計數論罰如百戶逃一人減半俸逃十人全不給至三十人降總旗至四十人降小旗至五十人發充軍其千戶逃軍十倍於百戶指揮逃軍五倍於千戶者並減俸及遞降如百戶例蓋國初之兵皆籍於此故其嚴如此

洪武初諭五軍府曰養兵而不病於農者莫若屯

田今海宇寧謐邊境無虞若使兵但坐食於農農  
必受弊非長治久安之術其令天下衛所督兵屯  
糧庶幾兵農合一國用以紓又諭曰天下衛所分  
民屯種者咸獲稼穡之利其令在屯軍士樹桑棗  
百株柿栗胡桃之類隨地所宜植之亦足以備歲  
歉之不給又諭今年屯種須於五月報禾苗長養  
何如七月報結實何如十月報所收籽粒若干一  
歲三報彼時留心屯政如此故大寧都督僉事商

曷奏見在糧粟大寧三十一萬石松亭關五十八萬石會州二十五萬石他鎮所報亦相若至宣德時所積之粟尤多立法之善古所未有也

屯田原額宣府屯軍八千六百七名屯地四千三百三十三頃五十畝各色籽粒二十五萬四千三百四十四石三斗一升大同屯軍一萬六千七百名屯地一萬五千八百三十頃各色籽粒五十一萬三千九百四石五斗五升山西屯軍九千四百九十

名屯地六千一百一十二頃一十畝各色籽粒二  
十五萬七千七百四十六石五斗五升遼東屯軍  
四萬五千四百五名屯地二萬五千三百七十八  
頃二十八畝額糧七十一萬六千一百七十石其  
後減徵四十五萬四千石固原延綏二鎮屯軍舍  
人二萬六千七百三十八名屯地二萬六千一百  
一十八頃二十一畝各色籽粒三十六萬五千一  
百四十石五斗四升六合寧夏屯軍一萬一千一

名屯地五千五百二十七頃九十二畝五分各色  
籽粒三十二萬二千七百二十二石二斗七升九  
合四勺甘肅屯軍二萬三千八十三名屯地一萬  
一千六百九十一頃五十畝各色籽粒六十萬三  
千一百八十八石四斗二升五合薊州屯軍五千  
八百七十五名屯地二千八百二十八頃五十一  
畝細糧六萬八千五百六十七石五斗九升其制  
每軍一名受田五十畝歲徵米二十四石以十二

石養贍其人十二石入倉給官俸並城操之兵倉中所積率足供數年之用

天下屯牛二十五萬五千六百六十四隻宣德以後各處衛分牛隻數目俱由五軍都督府照會工部立案備照倒死者著令買補孳生者查勘明白年終依例造冊奏送該府轉行工部知會工部設屯田司以司其事

附記

洪武二十二年兵部五軍府奉旨衛所官員不肯教兒子弓馬如今但有學唱的割了舌頭下棋打雙陸的斷了手蹴圓的却了脚做買賣的發邊遠充軍已而府軍左衛千戶虞讓男虞端吹簫唱曲將上唇連鼻尖割了龍江衛指揮伏願與小旗姚宴保蹴圓却了右脚當時禁制極嚴故一時將帥皆出其中而無世胄紈袴之氣後法禁弛而應襲舍人驕惰成性實稱乏才宣德五年正統八年成

化八年始令天下保舉有謀勇者用之天順八年  
開武舉成化四年弘治十七等年各有叅定條例  
然所取甚少初止取二名七年至十五名三十餘  
名及嘉靖後非武舉不得陞調於是世胄擁為虛  
器而功臣之澤斬矣

凡要害之地設官統兵鎮戍總鎮一方者曰鎮守  
獨守一路者曰分守獨守一城一堡者曰守備有  
與主將同處一城者曰協守又有備倭提督提調

等官其官稱掛印專制者曰總兵曰副總兵曰叅將曰遊擊將軍俱於公侯伯都督指揮等官內推舉後不然矣明初立君子舍人二衛選文臣子侄居君子衛武臣子侄居舍人衛晝則侍從夜則直宿更番此即勲衛之始後不用文臣子侄

春明夢餘錄卷三十

欽定四庫全書薈要卷七千六百八十二

史部

春明夢餘錄卷三十一 吏部侍郎孫承澤撰

戎政府

戎政府在皇城之東燈市大街永樂間設二帥府于都城內之東西以為會議之所後因敝壞嘉靖二十九年立戎政府統以勛臣一員曰總督京營戎政佐以文臣一員曰協理京營戎政營制有三中曰五軍東曰神樞西曰神機五軍營又析而為營者十有二神樞營析而

為營者十神機營析而為營者九總之為三十一營而五軍營設號頭營二神樞神機各一皆領于總協大臣而奉行其命令每營將領一人中軍官一人千總官二人把總官十有二人管隊官六十人每軍五十人為隊管隊領之二十五隊為司把總官領之十二司分隸于一中軍二千總各得把總官四人軍千人共卒三千人為一營故分之則三十一營聯之則三大營又聯之則總曰戎政府

# 營基

五軍營即舊團營景泰初年建立于安定德勝兩  
關外之中嘉靖二十九年罷團營始更於此南面  
建閱武門閱武門起至北土城止長一千七百四  
十二步設將臺一座前設旗臺二座石榜碑一座  
鼓棚一座石旗架二座演武廳一座

神樞營即舊三千營永樂初年建立於安定關外  
之東

神機營即舊五軍營永樂初年建立于德勝關外之西舊神機營在新立神機營之西嘉靖二十九年罷團營將五軍營更團營將神機營更舊五軍營而舊神機營竟廢

### 營制

洪武初定天下訓練軍士以衛京師置京營隸元帥府已而改五軍營曰中軍曰左掖曰右掖曰左哨曰右哨是為五軍隸都督府五軍都督握兵籍

而不與調發兵部得調發而不治兵論者謂五軍  
營有六善焉一軍有變四軍足制一善也徒御既  
寡訓練易施二善也人自為將各愛士卒三善也  
彼此相形爭先策勵四善也分數畫一行伍不亂  
五善也彼此相依聲勢相倚六善也大約開國之  
祖身在行間習于兵事故制之善如此後屢改而  
大失其故矣太宗遷都北平一如太祖之制則於  
中都大寧山東河南附近衛所摘發官軍輪班上

操營提督內臣一人武臣二人掌號頭官二人大  
營坐營官一人把總二人中軍坐營官一人馬步  
隊把總各一人左右掖左右哨官如之此則高皇  
帝五軍之舊也此外又有十二營掌隨駕馬隊官  
軍是營也把總二人此外又有圍子手營掌操練  
上直义刀手及京衛步隊官軍是營也坐營官一  
人一司二司三司四司各把總二人此外又有幼  
官舍人營掌操練京衛幼官及應襲舍人是營也

坐營官一人幼官營把總一人舍人營一司二司  
三司四司各把總一人此外又有殫忠効義營掌  
操練京衛報効舍人餘丁舍人營曰殫忠餘丁營  
曰効義是營也坐營官一人把總各一人此則五  
軍營之支分也已又得諸部降蕃一千人常立于  
龍旗寶纛之下以為三千營營分五司掌執大駕  
龍旗寶纛勇字旗負御寶及兵仗局什物等件上  
直軍為一司掌左右二十隊勇字旗大駕旗纛金

鼓等件上直軍為一司掌傳令營令旗令牌御用  
監盔甲尚冠尚衣尚履什物等件上直軍為一司  
掌執大駕勇字旗五軍紅盔貼直軍上直軍為一  
司掌殺虎手馬轎及前哨馬營上直明甲軍隨侍  
營隨侍東宮官舍遼東備禦回還軍為一司凡五  
司是營也提督內臣二人武臣一人掌號頭官二  
人坐司官五人見操把總三十四人上直把總十  
六人明甲把總四人此則三千營之支分也已征

交趾得其神機火箭之法立神機營掌操演神銃  
神炮諸火器亦分為五軍中軍坐營內臣一人武  
臣一人其下分為四司各監鎗內臣一人把司官  
一人把牌官一人左右掖軍如之左右哨軍亦如  
之已又得都督譚廣馬五千足當時謂之譚家馬  
復置五千掌操演火器及隨駕護衛馬隊軍是營  
也坐營內臣一人武臣一人其下分為四司各把  
司官一人此則神機營之支分也居常則五軍肆

營陣三千軍肄巡哨神機軍肄鎗手如大駕親征則大營居中營外五軍分駐步軍居內騎軍居外騎卒之外為神機營營之外有長圍周隣二十里樵採其中間此三大營之制也永樂雖遵洪武五軍之遺而各營添設內臣已違內臣不許典兵之禁未幾王振用事京軍五十萬一旦敗潰遂有土木之禍太宗貽之也

嘉靖二十九年二月命改舊內教場名曰內育營

欲以團操內使諭所司建一祀所並營舍數間中立一臺備御視

### 團營

景泰元年兵部尚書于謙建立京營團操法謙以京師兵馬分隸五軍三千神機諸營雖各有總兵然不相統一每遇調遣選摘湊撥號令不同兵將不相識或至悞事乃議揀選諸營馬步官軍十五萬分為十營每營各以都督總領每五千都指揮

一員每千指揮一員每五百把總十員分管每隊  
管隊二員常領在營操練體統相維兵將相識出  
征就令原管都督等官統領前去號令歸一行伍  
不亂團營之設自此始

十二營

天順初年反景泰之政革罷團營至八年而復及  
成化初又復革二年又復復則從兵部尚書馬昂  
議抽選京兵八萬外衛八萬外衛之兵分為二班

班四萬為瓜代合京兵為十六萬立十二團營操  
練之營曰奮武耀武練武顯武敢勇果勇効勇鼓  
勇立威伸威揚威振威營各分五軍三千神機三  
營五軍營領內外馬步官軍三千營領內外馬隊  
官軍神機營領內外步隊官軍而三大營之數不  
與焉是十二營軍名曰選鋒不任選鋒者仍歸三  
大營曰老家而團營之法稍變矣至于弘治正德  
之後又有兩官廳之制其法就十二團營挑選精

銳別立總兵叅將統領之此時十二團營可為老家而兩官廳可為團營也

設立戎政

嘉靖二十九年京都戒嚴大學士嚴嵩李本請刷京營圖善後令兵部選武臣以充總督坐營之任吏部選才望大臣專理之令其揀練人馬上是之下兵部兵部侍郎王邦瑞言國初營兵不減七八十萬元戎宿將常不乏人嗣是三大營變而為十

二團營又變為兩官廳雖浸不如初然原額軍尚足三十八萬有奇迄今承平既久武備廢弛見據在籍僅十四萬有奇而在營操練又不過五六萬人而已戶部支糧則有兵兵部調遣則無兵比者敵入事棘戰守俱虛見在軍士率老弱疾憊市井遊販之徒衣甲器械臨時取給其為耗弊可謂至極臣謂軍伍不足其弊不在逃亡而在占役訓練不精其弊不在軍士而在將領今之提督武臣即

十二團營之總帥坐營等官即諸營之主帥而號令把總之類又古之偏裨官其間多屬紈袴平時則占役營軍予以空名之餉臨操則四集市人呼舞博笑而已先是尚書王瓊毛伯溫劉天和皆嘗有意整飭將領惡其害已從中阻撓陰壞正議而軍士又驕惰厭律輒亡匿渙散倡為流言清理未半事復中止今皇上親見其害矣臣願遣風力科道官議覈十二團營人馬之數叅攷戶部糧籍汰

老弱留精壯逃亡者設法勾補占役者悉徵着伍  
然後人給衣甲器械擇謀勇將官加意練習而以  
科道官監視之上是之乃革去十二營兩官廳第  
用京營總兵官一員提督三營以復國初之舊時  
咸寧侯仇鸞方以兵事幸上即使為之于是兵部  
會議條為六事其一請革內臣謂自古宦者不得  
典兵今三大營內有內臣提督監鎗等項不下二  
三十人既不知兵又專役占所宜裁革其一請處

班軍謂河南山東大寧中都等處原額班軍十六萬有奇每年春秋更番上班操備往往為合營借工私占之貲自今請令于五月中旬赴京各都司統率入營一體操練至十一月中旬掣回休息不必兩班赴官如此則每歲京營秋防之時可得十五六萬人比之召募尤為省費上悉從之于是罷團營兩官廳以復舊制更三千營曰神樞營其三營司哨掖等名及諸內臣並裁革而統以大將一

員曰總督京營戎政廳給印曰戎政之印佐以文  
臣一員曰協理京營戎政

兵部尚書于謙置建團營疏議得各營見操官軍  
已選十萬分作五營團操以備出戰每二萬人為  
一營每隊五十名一人管隊每二隊又立領隊官  
一員每千人把總官一員每三五千入又立把總  
都指揮一員其管隊把總大小總兵官員各量其  
才器高下謀勇如何而選用之使之互相統屬兵

將相識如遇下教場操練之時臣等出其不意量調一隊或三隊五隊點視但喚把總管隊官姓名各官自行管領本隊軍士前來內喚出軍士一二人或三五人令管隊把總官識認是何姓名衛所却將軍人懸帶牌面上原開姓名衛所年貌查對若有不同就將管隊等官量情責罰仍比較刀箭牌刀長鎗等項武藝精熟者量為獎勵生疎者一體懲治使管軍者知軍士之強弱為兵者知將帥

之號令體統相維彼此相識不致臨時錯亂難于  
調遣大意前項團操軍士十萬合則為一營分則  
為五營萬一敵人來侵敵多則各營俱動敵少則  
分調一二營或調一萬三千隨機應敵其平日  
選定大小該管頭目已定至交戰之時多用則多  
調少用則少調止調該管頭目則士卒自隨平日  
相處既久同輩之人易以期會管事之人易以使  
令如手足之捍頭目子弟之衛父兄比之平日混

同操練不辨強弱不知號令將各營之人逐漸轉合者不同庶幾可以成功取勝又敵之所恃者弓馬衝突而已敵知我火器一發之後未免再裝遲慢以此我軍放罷火器就便馳突前來今若與之對敵我軍列陣外用鹿角遮護持滿以待敵若來緊堅陣不動元以弓弩對敵神銃未發先以火藥爆竹詐之敵必謂我火藥已盡不復畏避馳馬來攻則我軍火炮火銃飛鎗火箭弓矢齊發若勢衝

動又以大將軍擊之待敵勢動分調精銳馬軍用  
長鎗大刀勁弓射砍步軍用團牌腰刀一齊衝入  
敵陣或刺射人馬或砍其馬足臣等以身率先衝  
冒矢石獎勵士卒俾無退縮如有退縮者即以軍  
法治之此則臣等愚見操軍出戰分合之勢如此  
謹當用心設法將各營已選團操并其餘軍馬一  
體操習申嚴號令務使人馬強盛武藝精熟除團  
營之外另選次第精壯以備緩急調用以助團營

軍威每日除演習軍馬武藝外仍令馬步官軍兼習陣法及交鋒衝突安營走陣以為戰鬪之勢使之耳目慣熟步驟輕健能知進退坐作之法免至臨敵畏怯失措至于固守之法則今日士卒頗多京師城垣堅固又有戰車鹿角器具賊縱勢衆可以固守無虞但用兵之法不測如陰陽難知如鬼神貴在臨期應變難以一定而求况敵人趨捷去來之間如飄風驟雨應敵之際非勇無以挫其鋒

非智無以破其敵必謀勇兼濟可以成其功岳飛  
有言陣而後戰兵家之常運用之妙存乎一心又  
曰文官不愛錢武官不惜死天下太平矣景泰三  
年十二月二十二日各官奏奉聖旨是兵貴乎精  
將在謀勇卿等務要同心協力操軍馬有事運謀  
或戰或守若無事則撫卹士卒養其銳氣遇警急  
易為調用這等乃不負朕委托之重

大學士趙貞吉論營制疏照得我朝內外衛兵分

隸五府乃高皇帝定萬世太平之計俾免前代強  
臣握兵之害其為聖子神孫慮至深遠其法制甚  
周悉也永樂末年因聚府兵北伐旋師之後遂結  
營團操乃以三千神機二營附之因號為三大營  
其實皆為五府之兵也夫五府之兵因調伐而聚  
之為營既歸即當散還各府矣所以久聚操團而  
不散者以當時常有戒嚴征伐之事故不暇耳然  
猶以五軍名營實未變五府之舊制也沿至正統

末年嘗變為十團營矣弘治年間又加為十二團營矣正德年間又添置東西官廳矣然舊營之中尚存老家軍之籍則五營之號未泯而五府之意猶存也夫我太祖分府以設將則權任不偏而得將將之法我成祖分營以統兵則分數易明而得將兵之法得將將之法則無前代強臣握重兵之釁矣得將兵之法則合兵法御衆如御寡之方矣此祖制之盡善所當世守者也至嘉靖庚戌嚴嵩

欲為賊將仇鸞之地遂請于先帝特設戎政廳括  
內外兵籍鑄總督戎政之印而授之于鸞夫于五  
府之外而別立一廳則盡變太祖分府之意矣以  
十餘萬之衆而統于一人則盡變成祖分營之意  
矣時無骨鯁伐奸之臣故賊臣得以肆覬覦之計  
向使鸞遲于伏誅則時事之危未可測也鸞誅而  
以鎮遠侯顧寰代之寰惟知退讓自守以保勲名  
以避嫌忌耳然而營兵則日弱矣往歲戒嚴官軍

俱列營於城內其怯弱可知皆由輕變祖宗之法  
遂至將強而如鸞則有不軌之虞將弱而如寰則  
有不振之弊國家與強敵密邇而兵將之不足恃  
如此誠可為之寒心矣臣愚晝夜慮此竊謂分府  
設將之制未易卒復而分營統兵之法猶可遵行  
况近日兵部會推總督戎政之將武臣之中無堪  
任者蓋才足以統御十萬之衆而能變弱為強者  
非韓白之流不能當之求之今時果難其人矣若

夫才堪將一二萬之衆者猶或可選擇而使也合  
無將見操官軍九萬分為左右中前後五營各擇  
一將以分統之責令開營教習依法訓練仍以文  
臣巡覈之每歲春秋遣官較閱凡將官之能否軍  
士之勇怯技藝之生熟紀律之嚴縱皆得奏聞而  
賞賚罰治行焉務令五營齊成精銳先將戎政印  
收入內府有事則領勅掛印而命將于閫外事完  
則繳勅納印而歸將于營中如是則太阿之柄獨

持于上而輦轂之下常有數萬精兵可戰可守聽  
調聽戍隨所用無不宜矣轉弱為強之道寔不外  
此今若徒狃于戎政廳之設而不遵祖宗分府分  
營之意則將權重而避忌愈多兵不敢練也卒伍  
濶而分數不明兵不可練也責任歸于一人而觀  
望推委者多兵不能練也夫與其握兵權於一人  
坐視其廢弛以趨于弱孰若分其權於五人令其  
各自操練互相奮勉而漸趨于強以壯國威也哉

臣一得之愚所見如此伏望皇上俯賜採納

兵部尚書張學顏京營議以言今之兵制當我高  
皇帝開天合五府統隸之兵為一營操練有中軍  
有左哨右哨左掖右掖故名曰五軍營外以圍子  
手幼官舍人殫忠効義十二凡四營附之文皇帝  
繼極以龍旗寶纛下三千小達子立營故名曰三  
千營外以隨侍營附之又以神鎗及火器另立一  
營故名曰神機營外又以譚家馬附之夫曰五軍

曰三千曰神機此所謂三大營也景泰初因己巳之變遂于三大營中選立十團營成化中復增為十二團營以為操練之兵既未免權宜而非經弘治中又于十二團營中選立東西官廳兵以為聽征之兵亦未免失多而携寡至我先帝當庚戌歲敵騎長驅大飭戎務乃革十二團營及東西官廳之名盡歸五軍以光復我高皇帝之舊制因神機為神機改三千為神樞以式增我文皇帝之宏規

總之為三營以盡其大分之為一總督一協理二  
巡視四副將三十二營四百餘員千把總旗隊以  
盡其詳實昭析太甚固未嘗分數不明也在先帝  
力復祖制百方慎重之心會于羣臣告于祖廟方  
者定規畫其詔旨昭如日星有曰這事體非輕必  
復祖制方可事權歸一又曰朕復祖制三營修武  
當時諸臣合詞稱頌有曰規模宏遠修理精詳上  
增二祖修攘之耿光下垂萬世治安之成憲臣嘗

莊誦對揚以為我朝京軍三大營之制是高皇創立  
于始文皇增定于中先皇完成于終凡三聖人  
作為二百年遵守誠祖孫作述先後相成萬世聖  
子神孫當欽承無替此正我皇上所謂分營練兵  
係祖宗舊制外此固無所謂祖宗分營亦非所謂  
祖宗舊制也且先帝所克復祖宗成規不獨臣與  
在廷諸臣以為善即歲前九月皇上勅諭營臣有  
曰國家設立京營以養戰士越我皇考又更新戎

政申飭宏規其制大備今詔墨未乾是皇上之心亦已灼見其善矣夫既灼見其善而復強欲更之此固臣愚之所未解

京營事例

官軍

每年正二三四五六七八九十一十二月俱支本色四月十月支折色每米一石折銀五錢如是月米價騰貴臨時仍題給本色內正二七十二月赴通

倉支糧餘月俱京倉惟選鋒俱係京倉支領亦無折色各逃故應扣者每月各該營造冊投倉場轉行下糧廳查扣

軍選冬衣布花

每年每軍選各給綿布二疋綿花一斤八兩寶鈔二十五張軍係各該衛造領選鋒係各該營造領如內庫布疋不足臨期題給折色每布一疋折銀二錢五分

外衛官軍口糧本折

每班山東河南中都上班官軍以到京報名日為始除各該省解到各軍大糧銀聽候兵部委官給散外其口糧每官軍每月造支四斗雙月折色單月本色

官軍防秋口糧

車戰及標兵營官軍秋操每月各造支口糧三斗城守營各一斗三升備兵營無

火器選鋒口糧

萬歷二十七年該王世揚條議戰兵十枝每枝六  
司七司係火器選鋒春操每官軍每月造支口糧  
一斗秋操各造支一斗五升各該營把總春秋二  
操各該營動支犒賞銀各一兩充賞

單糧選鋒器械銀兩

萬歷二十年該京營科道郭士吉等條議三大營  
單糧選鋒春秋二季每季移文兵部劄行太僕寺

每名給銀三錢修整弓矢

馬匹草料本折

每馬一匹每月係大盡支草三十束料九斗小盡  
支草二十九束料八斗七升四季每草三十束俱  
折銀二錢二分每料豆一石春冬折銀四錢夏秋  
折銀三錢六分惟二月十月係支本色月分每草  
三十束折銀四錢料豆一石折銀四錢六分

城外信地

都城南有重城事勢稍緩不必設營外東自東便門起迤邐而西至西便門止即以車兵十枝酌量分布大率東北二面為急用八枝西面稍緩用二枝每枝實營盤一處虛營盤二處去城不遠不過二三里其戰兵六枝即于城之東西南北闕廂外各副將一員率領各屯一枝聽兵部總協斟量專備城內外調遣應援餘下二枝俱隨兵部總協同駐適中去處面相計議後又增戰兵十枝又于萬

歷二十年添設標兵二枝專隨總協

乘城信地

都城正陽崇文宣武三門外有重城每門止用軍二百名各委號頭官一員督率把總官管領其餘六門并重城七門每門官軍五百名與同各該守門官軍相兼把守一都城敵臺一百二座每座軍十名垛口一萬一千四百處每口軍一名一重城敵臺五十七座每座軍五名垛口九千三百五十

九處每口軍一名臨期并內城信地如有事故俱聽兵部總協于班軍內照數撥用每門將官一員督率千把總管領

充補單糧選鋒

凡單糧選鋒或事故或選補雙糧其缺各該管徑將精壯善射弓箭手取補

收補祖募軍丁

凡三大營軍缺如係逃故祖軍本戶弟男子侄赴

兵部告替驗發營操戶內無丁方行原籍清勾如  
係見操年老病疾或久猾逃故召募軍役近例赴  
總協軍門陳告發營行查每逢雙月類送過驗仍  
送科道衙門驗准該科道衙門會同戶兵衙門覆  
驗給票收糧

原額馬匹

凡三大營馬匹共二萬一千二百五十匹標兵二  
枝每枝馬七百五十匹二司至十二司每司馬四

十一匹惟頭司四司七司十司各四十三匹選鋒馬二百五十匹

戰兵十枝每枝馬一千二百五十匹頭司至四司每司馬八十四匹五司至十二司每司馬八十三匹選鋒馬各二百五十匹內惟神樞二營選鋒馬三百匹因先年薊鎮秋防以故較之別營選鋒馬多兌五十匹

辨驗馬匹

五軍營并標兵兩營每年新關領馬匹太僕寺于  
本馬右膀上印烙一五字到營仍將兩耳尖割去  
爲記神樞營馬匹左膀上印烙區字到營仍割去  
左耳尖爲記神機營馬匹右膀上印烙一八字到  
營仍割去右耳尖爲記每年終三大營馬匹該太  
僕寺會同巡視科道并車駕司通行印烙一次內  
有瘦損及倒死數多照例叅罰各經管官員甚不  
堪者變賣

倒死馬匹追椿年限事例

一年以上都指揮七兩指揮六兩千百戶五兩軍  
四兩二十七年該太僕寺少卿陳應芳條議倒死  
馬軍半年已上加追六錢半年以下加追三錢指  
揮千百戶仍舊

二年以上都指揮四兩五年以上都指揮三兩十  
年以上都指揮二兩五錢以下者俱各遞減五錢  
十五年以上俱免追椿銀走失者被盜者賠補凡

領馬一年以上倒死者例仍解究其餘免責

題准分操

三大營官軍先年俱在五軍營操練萬歷二十年該郭士吉等題准分三營操練至于合操仍歸五軍營凡車兵輪演日期亦赴五軍營以軍就車耳  
盛甲

凡三大營盛甲題准俱三年一次交廠兌換若選鋒明盛甲每年一次送修五百頂副

安置軍器有局

凡三大營官軍選鋒除弓矢各隨帶外其一應軍火器具俱安置于安定德勝門裡二處京營局房內遇該操日赴局領用操畢仍交此局各營派撥軍人看守

造辦鉛子火藥

凡京營火器所用鉛子火藥係工部王恭廠等預造以備京營領用每年二季開操各營具冊前赴

總督衙門用印投廠每五日三大營共領火藥三千餘斤中鉛子三千餘個小鉛子三萬餘個如遇風雨等項傳免操演則餘剩火藥鉛子具冊仍鈐印下次該操找領應用中鉛子每個重一兩二錢小鉛子每個重三錢五分

各項閱射修置箭把丈尺遠近

凡三年大閱每年小閱馬箭例設三把每把遠離四十步武舉場同其大小閱步把俱高一丈五尺

濶七尺五寸下濶八尺以八十步爲則其三年考試武舉官生每年選射材官并春秋二季操軍選補雙糧選鋒步把俱高九尺上濶四尺五寸下濶五尺若四衙門進營調閱官軍選鋒步把則高一丈三尺五寸上濶六尺五寸下濶七尺

內臣

內臣舊有監鎗名色嘉靖中盡革至天啟中又復竟名提督崇禎三年革至五年又復

崇禎二年十二月以司禮監太監沈良佐內官監  
太監呂直提督九門及皇城門司禮太監李鳳翔  
總督忠勇營提督京營

五年七月以司禮監太監曹化淳提督京營戎政  
七年十二月以乾清宮太監馬雲程提督京營戎  
政撤南京守備太監胡承詔張應朝以司禮太監  
梁洪泰內官太監張應乾協同守備

十年正月以御馬太監李名臣提督京城巡捕王

之俊副之司禮太監曹化淳提督東廠

十一年以司禮太監曹化淳杜勲等提督京營孫茂林分守薊鎮中西三協鄭良輔總理京城巡捕十四年九月改東廠提督京營者亦稱總督

十五年正月罷提督京營內臣從閣臣周延儒之言也是年十月誅司禮太監劉元斌初元斌監軍河南羣盜在陝雒元斌留歸德不敢進縱諸軍大掠殺樵汲者論功及論辟未得旨即奏辨上怒并

誅太監王裕民

十六年閣臣周延儒逮至京賜自盡復以內臣王之俊提督捕營諭內閣捕營向來所重在捕今必練得其法而捕在其中是首重在練亟擬勅來行時京營既有督察捕營又有練捕京城兵柄盡在內操閣臣不敢爭也

八月以司禮太監王承恩督察京營戎政韓贊周守備南京

十七年三月李自成陷宣府太監杜勲同總兵王承允降之隨入居庸關守關太監杜之秩亦降京師戒嚴上遣司禮監太監王承恩提督京城又召前太監曹化淳等分守諸門及賊薄京城杜勲呼諸監縋之而上科臣孫承澤請撤城守內臣兵部奏縋賊上城不省門開城陷王承恩殉難死

附記

崇禎十六年八月初九日上諭兵部京營居重馭


輕事權甚重見今從新整頓訓練亟宜得人襄城伯李國禎著總督京營戎政寫勅與他恭順侯吳惟英著後軍都督府掌府事宣城伯衛時春著暫解任學習候用

國禎少年紈袴數上書言兵又自請于京營外選練衛所官舍上甚喜即與勅行之及議餉俸歲費二十餘萬又請內庫兵仗銃藥甚多而乞上御書營額因取勅內共武二字以請上為親書共武堂

賜之未幾吳恭順罷特以國禎代之官舍皆併入  
京營時已設有內臣察理兵權盡在掌握更以少  
不更事之人一旦易將於是兵制大壞城陷協理  
戎政侍郎王家彥死之國禎棄城而逃賊追而殺  
之



春明夢餘錄卷三十一



總校官庶吉士 臣侍 朝

校對官檢討 臣王鍾健

膳錄監生 臣李青標